



SAOPĆENJE ZA JAVNOST

Optuženo troje kineskih državljana Radi iznude duga oteli dvoje sunarodnika

Tužilaštvo Brčko distrikta BiH podiglo je optužnicu protiv troje kineskih državljana s privremenim boravkom u Brčkom, zbog otmice dvoje sunarodnika izvedene u tom gradu u maju prošle godine. *Sun Baowei*, rođen 1970. godine, *Sun Xudong*, rođen 1981. godine i *Wang Shurui*, rođena 1977. godine, optuženi su da su 5. maja ispred *NEA Boutique Hotela* s ciljem iznude novca oteli sunarodnike Z. J. i H. G.

Baowei i *Xudong* terete se da su 5. maja, oko 9.00 sati, u namjeri da od Z. J. iznude poslovni dug, s dva tjelohranitelja sačekali izlazak oštećenih iz hotela, a zatim ih uz prijetnje uveli u automobil i odvezli u obližnji stan trećeoptužene *Shurui*. Tu su ih protivpravno držali do večernjih časova i prijeteći im pištoljima uslovljavali da prvooptuženom na ime duga iz ranijih poslovnih odnosa vrate iznos od 125 000,00 EURa - navodi se u optužnici. *Xudong* je pri tome pokazivao pištolj i palicu prijetivši napadom na život i tijelo oštećenih, dok je *Baowei* upućivao ozbiljnu prijetnju da će im polomiti noge i ruke. Istovremeno, tjelohranitelji *Baoweia* su im govorili da neće izaći iz stana dok se ne riješi problem s novcem, ukazujući im čak da znaju gdje su njihove porodice, dok je *Shurui* ukazivala da su prijeteći ozbiljne i kako neće dugo imati strpljenja. Koristeći telefon koji mu je ostavljen za kontakte radi slanja novca, Z. J. je uspio poslati poziv u pomoć prijatelju, koji je uveče tog dana događaj prijavio Policiji Brčko distrikta BiH. Otmičari su ubrzo uhapšeni, a uviđajem na mjestu počinjenja krivičnog djela Policija je pronašla dva pištolja, koje je neovlašteno posjedovao drugooptuženi *Xudong*.

Usljed opasnosti od bjekstva, a nakon hapšenja i predaje osumnjičenih Tužilaštvu, podnesen je prijedlog za određivanje pritvora za *Baoweia* i *Xudonga*, kojeg je sud prihvatio, dok su za *Shurui* predložene i određene mjere zabrane. Uspješno koordiniranu istragu, vođenu u intenzivnoj saradnji s Policijom, Tužilaštvo je okončalo podizanjem optužnice 8. decembra 2022. godine. *Baowei*, *Xudong* i *Shurui* optuženi su pred Osnovnim sudom za krivično djelo otmice, počinjeno u sastavu grupe (iz člana 177 stav 2 tačka Krivičnog zakona Brčko distrikta BiH). Usto, *Xudong* je optužen i za krivično djelo Neovlaštena nabavka i držanje ili prodaja oružja ili bitnih dijelova za oružje (iz člana 65 stav (1) Zakona o oružju i municiji Brčko distrikta BiH). U fazi prethodnog saslušanja pred sudom, optužnica je u cijelosti potvrđena 27. decembra 2022. godine.

*Preduzimanje radnji krivičnog gonjenja prema određenom licu ne znači da je to lice zaista i odgovorno za počinjenje krivičnog djela. Prema principu presumpcije nevinosti, svako se smatra nevinim za krivično djelo dok se pravosnažnom presudom ne utvrdi njegova krivica.